

壹、初善序分：釋題

大方廣佛華嚴經

入不思議解脫境界普賢行願品

貳、中善正宗分：十大願王

(壹) 十大願王

一、前行七支行願

(一) 禮敬諸佛

所有十方世界中，三世一切人師子，
我以清淨身語意，一切遍禮盡無餘。
普賢行願威神力，普現一切如來前，
一身復現剎塵身，一一遍禮剎塵佛。

(二) 稱讚如來

於一塵中塵數佛，各處菩薩眾會中，
無盡法界塵亦然，深信諸佛皆充滿。
各以一切音聲海，普出無盡妙言辭，
盡於未來一切劫，讚佛甚深功德海。

(三) 廣修供養

以諸最勝妙華鬘，伎樂塗香及傘蓋，
如是最勝莊嚴具，我以供養諸如來。
最勝衣服最勝香，末香燒香與燈燭，
一一皆如妙高聚，我悉供養諸如來。
我以廣大勝解心，深信一切三世佛，
悉以普賢行願力，普遍供養諸如來。

(四) 懺悔業障

我昔所造諸惡業，皆由無始貪嗔癡，
從身語意之所生，一切我今皆懺悔。

(五) 隨喜功德

十方一切諸眾生，二乘有學及無學，
一切如來與菩薩，所有功德皆隨喜。

(六) 請轉法輪

十方所有世間燈，最初成就菩提者，
我今一切皆勸請，轉於無上妙法輪。

(七) 請佛住世

諸佛若欲示涅槃，我悉至誠而勸請，
唯願久住剎塵劫，利樂一切諸眾生。

二、迴向七支功德

所有禮讚供養福，請佛住世轉法輪，
隨喜懺悔諸善根，迴向眾生及佛道。

三、正行三大願

(一) 常隨佛學

我隨一切如來學，修習普賢圓滿行，
供養過去諸如來，及與現在十方佛。
未來一切天人師，一切意樂皆圓滿，
我願普隨三世學，速得成就大菩提。

(二) 恆順眾生

所有十方一切刹，廣大清淨妙莊嚴，
眾會圍繞諸如來，悉在菩提樹王下。
十方所有諸眾生，願離憂患常安樂，
獲得甚深正法利，滅除煩惱盡無餘。

(三) 普皆迴向

1、別發十大願

(1) 受持願

〔1〕不忘宿命願
我為菩提修行時，一切趣中成宿命，

〔2〕出家持戒願
常得出家修淨戒，無垢無破無穿漏。

〔3〕轉法輪願
天龍夜叉鳩槃荼，乃至人與非人等，

所有一切眾生語，悉以諸音而說法。

(2) 修行二利願

〔1〕修波羅蜜願
勤修清淨波羅蜜，

〔2〕不忘失菩提心願
恆不忘失菩提心，

〔3〕消除障礙願
滅除障垢無有餘，

〔4〕成就妙行願
一切妙行皆成就。

〔5〕自由無礙願
於諸惑業及魔境，世間道中得解脫，

猶如蓮花不著水，亦如日月不住空。

(3) 成熟眾生願
悉除一切惡道苦，等與一切群生樂，

如是經於剎塵劫，十方利益恆無盡。

我常隨順諸眾生，盡於未來一切劫，

恆修普賢廣大行，圓滿無上大菩提。

(4) 不離師友願

〔1〕不離

同行道友願
所有與我同行者，於一切處同集會，
身口意業皆同等，一切行願同修學。

〔2〕不離

善知識願
所有益我善知識，為我顯示普賢行，
常願與我同集會，於我常生歡喜心。

(5) 供養願

〔1〕財供養

願常面見諸如來，及諸佛子眾圍繞，
於彼皆興廣大供，盡未來劫無疲厭。

〔2〕法供養

願持諸佛微妙法，光顯一切菩提行，
究竟清淨普賢道，盡未來劫常修習。

(6) 利益願

〔1〕獲功德藏願

我於一切諸有中，所修福智恆無盡，
定慧方便及解脫，獲諸無盡功德藏。

〔2〕遍入塵刹

利益願
一塵中有塵數刹，一一刹有難思佛，
一一佛處眾會中，我見恆演菩提行。

(7) 轉法輪願

普盡十方諸刹海，一一毛端三世海，
佛海及與國土海，我遍修行經劫海。
一切如來語清淨，一言具眾音聲海，
隨諸眾生意樂音，一一流佛辯才海。
三世一切諸如來，於彼無盡語言海，
恆轉理趣妙法輪，我深智力普能入。

(8) 淨土願

我能深入於未來，盡一切劫為一念，三世所有一切劫，為一念際我皆入。我於一念見三世，所有一切人師子，亦常入佛境界中，如幻解脫及威力。

(9) 承事願

於一毛端極微中，出現三世莊嚴刹，十方塵刹諸毛端，我皆深入而嚴淨。所有未來照世燈，成道轉法悟群有，究竟佛事示涅槃，我皆往詣而親近。

(10) 成正覺願

速疾周遍神通力，普門遍入大乘力，智行普修功德力，威神普覆大慈力。遍淨莊嚴勝福力，無著無依智慧力，定慧方便威神力，普能積集菩提力。清淨一切善業力，摧滅一切煩惱力，降伏一切諸魔力，圓滿普賢諸行力。

2、總結十大願

普能嚴淨諸刹海，解脫一切眾生海，善能分別諸法海，能甚深入智慧海。普能清淨諸行海，圓滿一切諸願海，親近供養諸佛海，修行無倦經劫海。三世一切諸如來，最勝菩提諸行願，我皆供養圓滿修，以普賢行悟菩提。

3、隨學二聖願

(1) 願等普賢

一切如來有長子，彼名號曰普賢尊，
我今迴向諸善根，願諸智行悉同彼。
願身口意恆清淨，諸行剎土亦復然，
如是智慧號普賢，願我與彼皆同等。

(2) 願等文殊

我為遍淨普賢行，文殊師利諸大願，
滿彼事業盡無餘，未來際劫恆無倦。
我所修行無有量，獲得無量諸功德，
安住無量諸行中，了達一切神通力。
文殊師利勇猛智，普賢慧行亦復然，
我今迴向諸善根，隨彼一切常修學。

(3) 總結迴向

三世諸佛所稱歎，如是最勝諸大願，
我今迴向諸善根，為得普賢殊勝行。

4、迴向極樂願

(1) 往生淨土願

願我臨欲命終時，盡除一切諸障礙，
面見彼佛阿彌陀，即得往生安樂剎。
我既往生彼國已，現前成就此大願，
一切圓滿盡無餘，利樂一切眾生界。

(2) 蒙佛授記願

彼佛眾會咸清淨，我時於勝蓮華生，
親睹如來無量光，現前授我菩提記。
蒙彼如來授記已，化身無數百俱胝，
智力廣大遍十方，普利一切眾生界。

四、總結行願無盡

乃至虛空世界盡，眾生及業煩惱盡，
如是一切無盡時，我願究竟恆無盡。

參、後善流通分

(壹) 顯示此經殊勝功德

一、校量聞經利益

十方所有無邊剎，莊嚴眾寶供如來，
最勝安樂施天人，經一切剎微塵劫。
若人於此勝願王，一經於耳能生信，
求勝菩提心渴仰，獲勝功德過於彼。

二、顯示眾行利益

(一) 獲五果功德

1、獲增上果功德

即常遠離惡知識，永離一切諸惡道，
速見如來無量光，具此普賢最勝願。

2、獲等流果功德

此人善得勝壽命，此人善來人中生，
此人不久當成就，如彼普賢菩薩行。

3、獲離繫果功德

往昔由無智慧力，所造極惡五無間，
誦此普賢大願王，一念速疾皆消滅。

4、獲異熟果功德

族姓種類及容色，相好智慧咸圓滿。

5、獲土用果功德

諸魔外道不能摧，堪為三界所應供。

(二) 獲究竟果功德

速詣菩提大樹王，坐已降伏諸魔眾，
成等正覺轉法輪，普利一切諸含識。

(貳) 勸請受持

若人於此普賢願，讀誦受持及演說，
果報唯佛能證知，決定獲勝菩提道。
若人誦此普賢願，我說少分之善根，
一念一切悉皆圓，成就眾生清淨願。

(參) 總集迴向

我此普賢殊勝行，無邊勝福皆迴向，
普願沉溺諸眾生，速往無量光佛剎。